

Headlines:-

- 1 भारत ने जनेवा च संयुक्त राष्ट्र दे कार्यक्रम च आतंकवाद दी मदाद करने ताई पाकिस्तान दी आलोचना कीती ऐ।
- 2 रक्षा मंत्री राजनाथ सिंह होरें आक्खेआ ऐ जे पाकिस्तानी मकबूजा जम्मू कश्मीर दे लोक आपुं गै भारत च शामिल होने दी मंग करै करदे न।
- 3 चुनां आयोग नै सियासी पाट्रिं समेत सब्बनें सरबंघत घड़ें गी लोकसभा चुनाएं च कागज दी घट्ट शा घट्ट बरतून करने लेई आक्खेआ ऐ।
- 4 मुख्खे दे बाकी हिस्सें आला लेखा जम्मू खित्ते च बी होली दा ध्यार पूरी श्रद्धा ते उत्साह कन्नै मनाया गेआ।

**India-Pak**

भारत नै आतंकवाद गी मदाद करने ताई पाकिस्तान दी नुक्ताचीनी कीती ऐ ते आक्खेआ ऐ जे इस्लामाबाद गी आतंकी कारखाने बंद करने दी सलाह दित्ती जानी लोड़चदी, जिनें बन्ने पारां थमां जम्मू कश्मीर च आतंकवादी हमले जारी रक्खे दे न। नमीं दिल्ली नै आक्खेआ ऐ जे आतंकवादिएं गी पनाह समर्थन ते मदाद देना पाकिस्तान दा इतिहास रेआ ऐ। कल जनेवा च अंतरा-संसदी संघ दे इक सौ 48में इजलास च बोलदे होई राज्य सभा दे डिप्टी चेयरमैन हरिवंश होरें अपने संबोधन च एह गल्ल आक्खी। उनें आक्खेआ जे संयुक्त राष्ट्र सुरक्षा परिषद आस्सेआ परिवंधित सब्बने थमां मती संख्या च आतंकवादिएं गी आसरा देने दा रिकार्ड पाकिस्तान कश ऐ। उनें आक्खेआ जे वैश्विक आतंकवाद दा चेहरा ओसामा बिन लादेन बी पाकिस्तान थमां गै लब्बा हा। भारती इलाके बारे पाकिस्तानी दी टिप्पणी गी खारज करदे होई हरिवंश होरें आक्खेआ जे दक नेह् मुख्ख आस्सेआ लोकतंत्र बारे लैक्वर देना इक मजाक गै ऐ जेह्दें अपने लोकतंत्र दा इतिहास इन्ना माड़ी ऐ। उनें आक्खेआ जे भारत दुनिया दा सब्बने थमां बड़डा लोकतंत्र ऐ ते इसी इक आदर्श लोकतंत्र मन्नेआ जंदा ऐ। जम्मू कश्मीर ते लद्दाख गी भारत दे अटूट हिस्सा गलांदे होई हरिवंश होरें आक्खेआ जे दुश्प्रचार कन्नै एह असलियत बदली नेई सकदी।

**Rajnath Singh-POJK**

रक्षा मंत्री राजनाथ सिंह होरें आक्खेआ ऐ जे पाकिस्तान दे नजैज कब्जे आले जम्मू कश्मीर दे लोक आपुं भारत कन्नै विलय दी मंग करा'रदे न। उनें भरोसा जताया जे गुलाम जम्मू कश्मीर दे लोक भारत च शामिल होइ जांगन। रक्षामंत्री होरें इक टीवी चैनल पर "आप की अदालत" प्रोग्राम च एह ब्यान दित्ता। पाकिस्तान दे प्रधानमंत्री शबाज शरीफ आस्सेआ हाल च कश्मीर बारे दित्ते गेदे ब्यान दे बारे च पुच्छे गेदे सुआले दे परते च सिंह होरें आक्खेआ "क्या ओह कदें बी कश्मीर लेई सकदे न"? उनेंगी ते पाक-अधिकृत कश्मीर दी चिंता करनी चाईदी। में कोई ढेड़ ब'रे पैहले आक्खेआ हा जे असेंगी हमला करने ते पाक-अधिकृत कश्मीर पर कब्जा करने दी कोई जरूरत नेइ ऐ। की जे उत्थें नेह् हालात बना'रदे न जे पाकिस्तान दे नजैज कब्जे आले कश्मीर दे लोक आपुं भारत कन्नै विलय दी मंग करा'रदे न। एह पुच्छने पर जे सरकार इत्त सरबंघै च कोई योजना बना'रदी ऐ। तां उनें परता दित्ता जे ओह होर मता किश नेइ दस्सी सकदे ते उनें गी होर किश दस्सना बी नेई चाहिदी। उनें आक्खेआ अस कुसै बी मुख्खे पर हमला नेई करगे। भारत नै अजें तक्कर कदें बी कुसै मुख्खे पर हमला नेई कीता ऐ। पर पीओजेके सदा साढ़ा हा, साढ़ा गै रौहग ते मिगी पूरा विश्वास ऐ जे पीओजेक आपुं भारत कन्नै विलय करी लैग।



Ujjain Fire

मध्यप्रदेश दे उज्जैन दे महाकालेश्वर मंदरै दे गर्भगृह च अज्ज बडलै अग्न लगी गई। एह घटना भस्म आरती दरान होई। इस घटना च पुजारी सनें दर्जनां लोक घायल होने दी खबर ऐ। घायलें गी इंदौर ते उज्जैन दे अस्पतालें च भर्ती कराया गेआ ऐ। उज्जैन दे कलेक्टर नीरज सिंह होरें घटना दी जांच दे हुक्त दित्ते न। मुखमंत्री डॉ. मोहन यादव होरें दोषिएं खलाफ सख्त कारवाई करने दे निर्देश दित्ते न।

<><><><><><>

PM-Ujjain Fire

प्रधानमंत्री नरेन्द्र मोदी होरें उज्जैन दे महाकाल मंदरै च अग्न लगने दी घटना पर दुख प्रगट कीता ऐ। उनें इस हादसे च घायल होए दे सब्बने श्रद्धालुएं दे तौले नरोए होने दी कामना कीती। श्री मोदी होरें आकखेआ ऐ जे राज्य सरकार दी दिक्ख-रिक्ख च स्थानीय प्रशासन पीड़ितें दी हर मुमकन मदाद करा'रदा ऐं तोआई केन्द्री गृहमंत्री अमित शाह होरें उज्जैन महाकाल मंदरै च आगजनी दी वारदात बारे मध्यप्रदेश दे मुखमंत्री मोहन यादव हुंदे नै गल्लबात करियै हादसे बारे पुच्छ-पड़ताल कीती। अपनी इक सोशल मीडिया पोस्ट च श्री शाह होरें आकखेआ जे स्थानीय प्रशासन प्रभावतें दे इलाज-मुआलजे दियां सब्बै सहूलतां मुहैया करोआ'रदी ऐ।

<><><><><><>

Punjab Holi-BSF

पंजाब दिएं बक्ख-बक्ख सरहदी चौकिएं पर बीएसएफ दे जुआनें इक दुए गी लाल-गुलाल मलियै होली मनाई। शहीद जुआनें दे परिवारे ते स्कूली बच्चें बी बीएसएफ दे जुआनें कन्नै होली खेड्डी। पठानकोट च बमियाल सेक्टर च मुख्य ताई शहीद होए दे बीएसएफ कर्मिएं दे मत्थें पर तिलक लाइयै होली मनाई ते उंदा होंसला बधाया। इस मौके पर सब्बने देश भक्ति संगीत पर नाच कीता ते सारा वातावरण भारत माता दी जय दे नारें कन्नै गुंजी गेआ।

<><><><><><>

ECI-Sustainable Polls

चुनां आयोग औंदे लोकसभ्रा ते असेंबली चुनाएं दरान पर्यावरण दे सतत संरक्षण लेई बढ़ावा देआ'रदा ऐ। आयोग नै चुनां मशीनरी ते सियासी पार्टिएं गी निर्देश जारी कीते न जे ओह वोटर-फेहरिस्तें ते मतदाता समेयान च कागज दा घट्टोघट्ट इस्तेमाल करन। आयोग नै ताकीद कीती ऐ जे ई-कताबें ते ई-दस्तावेजें दा मते शा मता इस्तेमाल कीता जा ते प्रिंट करदे'लै कागज दे दौनें भेठा प्रिंट कीता जा। निर्देशें च इबे आकखेआ गेआ ऐ जे चुनां संचार दरान इलेक्ट्रानिक तरीकेकार दा बद्धोबद्ध इस्तेमाल कीता जा। आयोग नै चुनां मशीनरी ते सियासी पार्टिएं गी आकखेआ ऐ जे ओह इक्के बारी इस्तेमाल च औने आले प्लास्टिक दी बरतून भलेयां नेइ दे बरोबर करन ते पर्यावरण अनुकूल लोकसभा ते असेंबली चुनाएं लेई बक्ख-बक्ख कूड़ेदान लान। हर किस्म दी रैंद-खैंद गी ठकाने लाने दे मुनासब प्रबंध करन। मतदान पैनल नै आकखेआ ऐ जे औन-जान लेई पर्यावरण दोस्त गड्डिएं दा इस्तेमाल कीता जा। कारपूलिंग कीती जा ते मतदान दे दिनें सार्वजनिक गड्डिएं दा इस्तेमाल कीता जा।

<><><><><><>

Holi Udhampur

जिला प्रशासन ते बपार मंडल उधमपुर पाससेआ इस मौके होली उत्सव शुभा यात्रा दा आयोजन कीता गेआ। एधमपुर-रियासी रेंज दे डीआईजी पुलस रईस मोहम्मद मट्टू हुंदे समेत प्रमुख शैहरदारें, दकानदारें ते युवाएं बधी-चढ़ियै एहदे च हिस्सा लैता। बक्ख-बक्ख समुदायें दे लोके बी यात्रा च शामिल होए, जेहड़ी शैहरे दे बक्ख-बक्ख बजारें चां लंघी।

<><><><><><>

Reasi First Time

पूरा मुख्य अज्ज जिसलै होली मना करदा ऐ, रियासी दे पैहली बारी वोट पाने गी तैआर मतदाताएं इस मौके लोकें गी अगले म्हीने थमां शुरू होने आले चुनाएं दे महा पर्व च बधी-चढ़ियै हिस्सा लैने लेई प्रेरित कीता। रियासी थमां युवाएं मतदाताएं गी होली दा जज्बा मतदान केन्द्रें च लेने दा अनुरोध कीता। आकाशवाणी समाचार कन्नै गल्ल करदे होई पैहली बारी वोट पाने आले आकाश द्वीप सिंह ते ओह्दे साथिएं लोकें गी देश दा महा पर्व च अपनी हाजरी दर्ज कराने दी अपील कीती।



Holi Poonch

पूरे पुंछ जिले च होली दा ध्यार बड़ी खुशी ते उत्साह कन्नै मनाया गेआ। सनातन धर्म सभा पास्सेआ इस मौके पर धार्मिक यात्रा दा आयोजन कीता गेआ जेह्ड़ी गीता भवन थमां शुरू होई ते मेन बजार, हाथी धन बजार ते परेड थमां होंदे होई राधा कृष्ण मंदर जाइयै सम्पन्न होई, जित्थें श्रद्धालुएं भगवान कृष्ण दी पूजा-अर्चना कीती।



BSF Holi

सीमा सुरक्षा बल दे जुआनें पुंछ च नियंत्रण रेखा कश रंगें दा पर्व होली मनाई। चुनौती आले हालात दे बावजूद बन्ने पर तैनात इनें जुआनें दे जज्बा दिक्खदे गै बनदा हा।



Holi Jammu

रंगे दा ध्यार होली अज्ज जम्मू शैहरे च पूरे जोश ते खुशी कन्नै मनाया गेआ। इस्कान मंदरै च फुल्लें दी होली ते आर.एस.पुरा च होली महोत्सव इस मौके खास आकर्षण हे। बक्ख-बक्ख समुदायें दे लोकें इक दुए गी रंग लाया ते सांस्कृतिक कार्यक्रमें च हिस्सा लैता।



Holi Kathua

जिला कठुआ च बी रंगें दा ध्यार होली पूरे जोश ते जज्बे कन्नै मनाया गेआ। केई नोजवान जागत-कुड़ियां टोलिएं च मोटर सैकलें पर सुआर होइयै दिक्खे गे। केई लोक ढोलै दी तालै पर नचदे-त्रपदे ते भांगड़ा पांदे ते इक दुए गी गुलाल लांदे दिक्खे गे।

